

成都楊慎編著
漢陽張三異增定 張仲璜註

廿一史彈詞註
(三)

中華書局印行

廿一史彈詞註卷之八上

第八段 說五代史 定風波

雨汗淋漓赴選場。秀才落得甚乾忙。白髮漁樵諸事懶。蕭散。閒談今古論興亡。
虞夏商周秦楚漢。三分南北至隋唐。看到史官褒貶處。得趣。不搖紈扇自然涼。
詩曰。

山自青青水自流。南征北戰幾時休。青春壯士邊關老。紅粉佳人白了頭。
十遇征夫九皺眉。忘餐廢寢有誰知。中宵破夢兜鈴舉。頓飯驚心戰馬嘶。剪
髮搓繩穿斷甲。拆衣抽線補殘旗。風流宰相龍樓宴。翠袖雙扶下玉梯。

詩向會家閒講究。話逢知己細評論。評論往事知賢否。講究前賢說廢興。東
岸水流西岸響。南山風送北山雲。雲容冉冉舒還卷。水勢滔滔古又今。流水

浮雲何日了。人生在世幾回春。消磨白髮詩和酒。斷送青春利與名。蓋世功名野馬飜。掀天事業闔婆城。半張故紙留蹤跡。千古漁樵作話文。闢論高談依故典。長歌短曲弔英魂。就中多少悲歡處。珍重相知勿倦聽。

說過隋唐三百載。一場春夢別翻公案。五代史多少興亡。要知去跡來踪。閱盡殘篇斷簡。按五代者。梁唐晉漢周是也。起朱溫。終周恭帝。凡十三主。纔六主善終。略談於後。

後梁太祖朱溫。本碭山小民。爲黃巢賊黨。力屈降唐。後因有功封梁王。賜名全忠。弒了唐昭宗。自稱皇帝。開平乾化在位六年。被妾生子鄆王朱友珪刺死。其第三

子均王友貞討誅友珪。貞明龍德又十年。唐莊宗滅之。共十六年而亡。

唐主李存勗。其先朱邪國昌。乃沙陀國人。有功於唐。賜姓李氏。其父李克用。封晉王。去世之後。李存勗滅了梁國。自稱唐主。謂之莊宗。同光在位四年。被樂官郭

從謙所弒。其義兄明宗卽位。天成長興傳之愍帝。應順又被義兒潞王所弒。潞王自立。

三年。清泰被石駙馬所篡。前後四主。共十四年而亡。

晉主石敬瑭。乃唐明宗駙馬。割地臣虜。借兵滅唐。爲晉高祖。天福在位七年。傳與

兄子石重貴。開運被北番擄入胡地。共十一年而亡。

漢高祖劉知遠。石晉之臣。乘契丹滅晉稱帝。天福傳子承佑。是爲隱帝。乾祐輕誅功臣。被其臣郭威所弑。父子共四年而亡。

後周太祖郭威。連弑劉承佑。劉贊。篡漢。廣順在位三年。無嗣。其妻兄之子柴榮襲

位。是爲世宗。顯德七年而崩。子宗訓卽位。七月。禪位與趙匡胤。按後周二主二姓。

共十年而亡。此謂之五代十三君。一起一滅。五十三年中間。又有僭號之國十

一處。稱王稱帝。賢愚不同。

福建閩王王審知。唐僖宗時受封。據福建。統五州。傳其後王延翰。王延鈞。龍王

延昶。永和通文王延曦。永隆王延政。天德共六主五十年。而降於吳越。

吳越國者。起錢鏐。唐昭宗時受封。據兩浙。統十三州。是爲武肅王。寶正傳其後文

穆王元瓘忠獻王弘佐弘倬弘俶。凡五主八十四年。歸降於宋太祖。

淮南吳王楊行密。唐昭宗時受封。據廬州二十八郡。號忠武王。傳之威王渥宣

王隆演。

武讓王溥。

順義乾貞大和天祚。

凡四主。共三十六年。禪位與南唐。

江南唐王李昇。本淮南楊氏之臣。徐溫之義子。係唐朝子孫。受吳王封。爲齊王。

受楊溥禪位。建國金陵稱帝。統三十五州。號烈祖。傳之子李景。是爲後主。

保大交泰。

宋太祖乾德二年卒。其子李煜嗣位歸宋。凡三主。共三十九年而亡。

湖南楚王馬殷。唐昭宗時爲刺史。據潭州二十三郡。朱溫時受封。是爲武穆王。

傳其子希聲希範希廣希萼希崇。凡六主。共五十六年。南唐後主滅之。

荆南秦王高季興。梁朱溫之臣。又降唐降吳。受吳封爲秦王。據荆南三州。傳其

後高從誨保融保勗繼冲。凡五主。共五十七年。降於宋。

西川蜀王王建。唐僖宗時爲利州刺史。昭宗時受封。後稱帝。據成都四十八州。

是爲高祖。

武成通正。

永平天漢。

傳其子宗衍。

光天德。

乾成。

共二十五年。唐莊宗滅之。

後蜀王孟知祥。唐明宗時受封。據成都三十六州。傳其子景。明德廣政共四十年。降

於宋太祖。

北幽燕王劉守光。梁太祖時受封。後稱帝。唐莊宗滅之。

廣南漢王劉隱。梁太祖時爲清海節度使。弟劉巖稱帝。據廣南四十。七州。乾亨白龍

大傳之子玢。光天應乾晟。乾寶和。凡四主。共五十五年。宋太祖滅之。

河東晉主劉崇。漢高祖知遠之弟。因郭威篡漢。遂稱帝於晉陽。謂之北漢。世祖

傳其子承鈞。是爲孝和皇帝。天會無嗣。先是有營卒薛釗。娶世祖女爲妻。生子繼

恩。世祖卽位。其女居內。薛釗自刎。世祖以繼恩與孝和爲嗣。其母改嫁何氏。又

生子名繼元。亦與孝和爲嗣。廣運相傳四主。共二十九年。宋太祖併之。

凡此十一處稱王稱帝者。共四十一人。

自唐末梁初。各各據土僭號。至宋太宗太平興國四年。通共八十二年。北漢劉繼元歸附之後。僭僞盡絕。那時天下生靈。受了多少塗炭。見了多少干戈。今從

五代梁朱溫創始之初說起。

按五代始於梁。朱溫創首。

梁唐晉漢周爲五代。始朱溫篡奪唐祚稱帝。改國爲梁。

本碭山無藉子。一箇窮民。

朱溫。宋州碭山午溝里人。少孤貧。與兄存昱。傭食蕭縣劉崇家。崇數笞辱之。後稱帝。兄全昱曰。朱三。汝本碭山一民也。從黃巢爲盜。天子用汝爲四鎮節度使。富貴極矣。奈何一旦滅唐家。三百年社稷。他日得無滅吾族乎。宋州。今歸德府。碭山縣。蕭縣。俱屬徐州。括地志云。宋州碭山縣。在州東百五十里。碭山。在縣東。按今歸德府秦碭郡也。

唐之末。金色蝦蟆。太行造反。

唐天僖中。有童謠曰。金色蝦蟆爭弩眼。翻却曹州天下反。後王仙芝果陷曹州。黃巢應之。巢後攻陷長安。自稱大齊皇帝。改元金統。太行山。在河內山陽縣西北上黨南。又在懷慶府城北二十里。山勢綿亙數千里。雖各因地之名。其實皆名太行。

聚鄉民。相接應。占據河中。

黃巢起曹濮。溫聚衆應之。巢陷京師。以溫爲東南面行營先鋒使。討河中留後王重榮。數爲重榮所敗。溫乃因重榮以同州降。都統王鐸表溫爲河中行營招討副使。後重榮死。子珂爲河中留後。溫取河中。執珂殺之。奏乞除河中節度。諷吏民請已爲帥。河中。今平陽府蒲州。

勢敗也。乃降唐。獲功受賞。

時唐僖宗在蜀。以首相王鐸爲諸道行營都統。會諸鎮兵討巢。進逼長安。官軍四集。巢勢日蹙。號令所行。不出同華。溫知其將亡。遂以華州降唐。鐸以溫爲同華節度使。尋令兼淮南節度使。又令爲秦州四面行營都統。進爵東平郡王。更拜爲宣武宣義天平護國節度使。未幾。進爵梁王。後又賜號回天再造竭忠守正功臣。同華二州名。俱屬西安府。護國。卽河中。今蒲州。

賜御名。易全忠。猛氣兇鋒。

唐僖宗賜溫名全忠。溫狙獪兇暴。殘忍屠戮。顧氏曰。怒鬚仇目。奸鋒中人。險威震主。虎負鷹視。

所忌者。晉蜀岐。皆爲勍敵。

封魏王。加九錫。几肉唐宗。

初。全忠爲宣武節度使。李克用爲雁門節度使。王建爲西川節度使。李茂貞爲鳳翔節度使。各擁強兵。屢相攻戰。唐昭宗封克用爵晉王。建蜀王。茂貞岐王。全忠梁王。後全忠弑昭宗而立昭宣帝。急於傳禪。密使蔣元暉等謀之。元暉以魏晉以來。皆加九錫殊禮。然後受禪。全忠曰。汝曹巧述閑事。以沮我。借使我不受九錫。豈不能作天子耶。元暉曰。唐祚已盡。天命歸王。但以晉蜀岐皆吾勍敵。王遽受禪。彼心未服。不可不曲盡義理。然後取之。元暉歸謀於柳璨等。乃以全忠爲相國。總百揆。進封魏王。加九錫。全忠怒不受。綱目曰。溫視唐宗。猶枕上之肉。惟所烹醢耳。宣武軍名。今開封府。

效推戴。張文蔚。蘇循。李振。

初元暉等議加全忠九錫。朝士多憤色。唐禮部尚書蘇循揚言曰。梁王功業顯大。曆數有歸。朝廷宜速行揖讓。朝士無敢違者。後昭宣帝禪位於梁。遣宰相張文蔚及循與御史大夫薛貽矩等奉冊寶如梁。全忠遂稱帝。文蔚等舞蹈稱賀。全忠舉酒勞之曰。此皆諸公推戴之力也。文蔚慚伏。獨循與貽矩盛稱功德以爲應天順人。李振註見下。

弒昭宗假啼哭無樣欺心

判官李振爲全忠心腹。每自汴至洛。朝臣必有竄逐者。時謂之鴟梟。全忠欲立幼君。易謀禪代。遣振至洛陽。與蔣元暉及朱友恭氏叔琮等圖之。振遂與元暉謀夜弒昭宗於椒殿。全忠聞之。陽驚哭曰。奴輩負我。令我受惡名於萬代。至東都。伏梓宮慟哭。殺友恭叔琮。友恭臨刑大呼曰。賣我以塞天下之謗。如鬼神何。

服袞冕篡唐朝改名朱晃

初張文蔚等率百官勸進。全忠更名晃。文蔚奉冊寶至金祥殿。晃遂披袞冕即位。是爲後梁太祖。

夾寨戰幽州戰眉蹙難伸

梁遣康懷貞攻晉潞州。晉李嗣昭閉城拒守。懷貞攻之不克。乃築壘穿塹守之。內外斷絕。晉遣周德威救之。壁於高河。懷貞擊之大敗。梁遣李思安代之。更築重城。內以防奔突。外以拒援兵。謂之夾寨。時相持逾年。會晉王克用卒。子存勗立。與諸將謀曰。朱溫所憚者。先王耳。聞吾新立。必有驕怠之心。若出其不意。破之必矣。乃帥兵直抵夾寨。填塹燒寨。鼓譟而入。梁兵潰走。潞州圍解。晃聞之。驚歎曰。生子當如李亞子。克用爲不亡矣。晉師伐幽州。燕王劉守光求救於梁。晃自將救之。進圍蓿縣。晉將李存審引兵扼下博橋。使史建塘李嗣肱分道擒生。遇梁軍之樵芻者皆執之。獲數百人殺之。留數人斷臂縱去。曰。語朱公。晉王大軍至矣。建塘嗣肱各將三百騎。效梁軍旗幟服色。與樵芻者雜行。暮至營內。縱火大譟。營中大擾。斷臂者復來曰。晉

軍大至矣。見大駭。燒營夜遁。委棄資械。不可勝計。既而復遣騎覘之。曰。晉軍實未來。此乃史先鋒遊騎耳。見慚憤。遂病。顧氏曰。夾寨之戰。鋒摧銳沮。柏鄉之戰。挫衆損師。幽州之戰。收迹遠遁。鬱鬱然填恨低首。常不伸眉。舊縣故城。在河間府景州城內。下博縣名。今省入眞定府深州。德威字鎮遠。馬邑人。

預料著。自死後。身無葬地。

見還至洛陽。疾甚。謂近臣曰。我經營天下三十年。不意太原餘孽。更昌熾如此。吾觀其志不小。天復奪我年。我死。諸兒非彼敵也。吾無葬地矣。因哽咽。絕而復蘇。

縱淫邪。私子婦。狗行狼心。

見長子郗王友裕。早卒。次假子博王友文。留守東都。次郢王友珪。爲控鶴指揮使。次均王友貞。爲東都指揮使。見恣意淫邪。諸子在外。常徵其婦入侍。友文婦王氏色美。見尤寵之。郗。今湖廣郴州。博。今山東東昌府。郢。今武昌府。均。州名。屬襄陽府。

朱友珪。高聲罵。老賊萬段。

万作爲。天報應。寢殿尸橫。

見疾甚。命王氏召友文。欲付以後事。友珪婦張氏知之。密告友珪。友珪遂入左龍虎軍。見統軍韓勣。相與合謀。以牙兵從友珪。雜控鶴士中。夜斬關入。至寢殿。見驚起曰。我固疑此賊。憾不早殺之。友珪曰。老賊萬段。友珪僕夫馮廷諤。以劍刺見。洞其腹。刃出於背。以敗氈裹之。瘞於寢殿。友珪遂即位。尹氏曰。朱溫篡唐。其兇暴悖逆。世所未有。溫旣能以臣弑君。故友珪亦能以子弑父。其屠戮之慘。皆天理昭昭之報也。

朱友貞討逆賊誅兄報父

梁駙馬都尉趙巖，見之壻也。奉使至大梁，均王友貞密與謀誅友珪。巖曰：「此事成敗，在楊令公。時楊師厚爲天雄節度使，宿衛勁兵，多在麾下。友貞乃遣心腹說之，師厚謀之將佐，或曰：『鄆王親弑君父，賊也。』均王舉兵復讐，義也。厚乃使其將王舜賢至洛陽，陰與兇甥龍虎統軍袁象先謀，巖歸亦與象先定計。遂帥禁兵突入宮中，友珪令馮廷諤先殺妻，後殺已。廷諤亦自殺。友貞遂卽位於大梁，是爲梁末帝。天雄軍名，今大名府。」

寵張趙任段凝閹弱無能

德妃張氏卒，將葬。康王友敬使人於寢殿作亂，執誅之。友貞由是疎忌宗室。寵任趙巖及兄弟漢鼎、漢傑從兄弟漢倫等，咸居近職，弄權賣爵。政事日紊。段凝詔附張趙，每出兵，必使爲監副。捷奏至，張趙悉歸功於凝，凝重賂之，求爲招討使。由是將士憤怒。後梁將康延孝奔唐，唐主存勗問以梁事，延孝曰：「梁主閹懦，張趙擅權，段凝智勇俱無，專斂行伍以奉權貴，願陛下養勇蓄力，直抵大梁，擒其僞主，天下定矣。」康，今肇慶府德慶州。

棄敬翔罷劉鄩一時智勇

平章敬翔，深沉有智略。從是用兵三十年，細大之務必關之。及友貞立，趙巖等用事，翔每進言，皆不聽。後梁盡失河北，翔曰：「國家疆土日蹙，臣雖憊矣，受國恩深，願得自效。」巖等以翔有怨言，遂棄不用。後唐軍且至，友貞遽呼翔曰：「朕居常忽卿言，今急矣，將若之何？」翔泣曰：「臣雖爲相，實朱氏老奴，事陛下如郎君，前後獻言，陛下不用，致有今日。雖良平復生，誰能爲陛下計者？」及唐軍入，翔遂自縊。鎮南軍節度使劉鄩好兵書，有機略。唐主存勗嘗曰：「劉鄩用兵，一步百計，後與存勗相持於莘縣，友貞以書責戰，鄩報曰：『晉兵甚銳，未易輕也。』友貞怒，鄩曰：『主

暗臣諛。將驕卒惰。吾不知死所矣。後河朔皆入於唐。罷鄆爲亳州團練使。段凝素惡鄆。乃譖之罷。鄆歸洛陽。酖殺之。莘縣屬東昌府。亳州屬鳳陽府。敬翔同州人。

王鐵鎗好男兒豹死留名

招討使王彥章。驍勇絕倫。每戰用二鐵鎗。皆重百觔。一置鞍中。一在手。所向無前。軍號王鐵鎗。先是以段凝趙巖之譖。罷彥章還第。及唐兵攻兗州。乃召用之。是時梁之勝兵。皆屬段凝。京師祇有保嬰五百騎。以屬彥章。至遞坊戰敗。退保中都。又敗。彥章死戰。唐將夏魯奇識其語。晉曰。王鐵鎗也。舉稍刺之。彥章傷重馬蹶。遂被擒。唐主存勗惜之。賜藥以傳其創。彥章不知書。常爲俚言。謂人曰。豹死留皮。人死留名。存勗屢遣人誘諭之。彥章曰。臣與皇帝血戰十餘年。今兵敗力窮。不死何待。豈有朝爲梁將。暮爲唐臣。遂見殺。中都。今兗州府汶上縣。

李亞子大兵來號咷乞命

李克用病篤。命立其子存勗爲嗣。謂其弟克寧曰。以亞子果汝。亞子。存勗小字也。王彥章嘗謂人曰。李亞子鬪雞小兒。何足畏。至是唐兵至曹州。梁守將皆降。友貞聞彥章就擒。唐軍且至。聚族而哭。召羣臣問策。皆莫能對。置傳國寶於臥內。左右竊之以迎唐軍。友貞惟日夜號哭。不知所爲。曹州屬兗州府。

皇甫璘揮短劍了當殘生

友貞謂指揮使皇甫璘曰。吾不能自裁。卿可斷吾首。璘泣曰。臣爲陛下揮劍死唐軍。則可矣。不敢奉此詔。友貞曰。卿欲賣我耶。璘欲自刎。友貞持之曰。與卿俱死。璘遂弑友貞。因自殺。

父共子十七年風燈草露

梁太祖末帝父子共十七年。

被唐朝追貶做小可凡民。

唐毀梁宗廟。追廢朱晃友貞爲庶人。

唐家者。乃唐朝沙陀降將。

李國昌。子克用。赴難朝廷。

李國昌。本名赤心。其先號朱邪。蓋出於西突厥。至其後世。別自號曰沙陀。而以朱邪爲姓。唐懿宗時。赤心以有功。拜振武節度使。賜姓名曰李國昌。子克用。爲沙陀副兵馬使。唐僖宗乾符中。克用殺大同防禦使段文楚。自爲留後。僖宗乃拜國昌爲大同節度使。國昌欲父子并據兩鎮。得制書毀之。殺監軍。與克用合兵擊寧武及崑崙軍。盧龍節度李可舉討敗之。國昌父子亡走鞏。鞏黃巢陷長安。朝廷赦之。遣李友金召之。克用始將沙陀兵趨河中。赴難長安。僖宗以爲雁門節度使。後封晉王。至唐爲朱溫所滅。克用卒。長子存勗嗣位。遂稱帝。國號亦曰唐。是爲後唐。朱邪處月之別種。西突厥苗裔。世居金婆山之陽。蒲類海東。其地有大磧名沙陀。後因以沙陀爲號。以朱邪爲姓。振武軍名。今大同府寧武故址。在大同府朔州。南崑崙軍。今爲州。屬太原府。

獨眼龍。破黃巢。功居第一。

克用一目微眇。時人謂之獨眼龍。與黃巢戰於渭南。一日三捷。巢敗走。克用遂入京師。時克用年二十八。於諸將最少。破黃巢。復長安。功第一。諸將皆畏之。

與朱溫。劈廝對。屢次交兵。

克用屢敗巢兵。追巢至於冤句。巢遁走。克用還過汴州。朱溫館於上源驛。克用乘酒使氣。溫不平。克用醉臥。溫發兵圍驛攻之。左右以水沃其面而告之。克用始張目。援弓而起。會大雨震電。克用隨電。縋城得出。還太原。訟於京師。請加兵於汴。僖宗詔和解之。克用由是不平。與溫互相攻伐。兵連不已。

憤逼京。負罪愆。羣奸挑激。

僖宗光啓元年。河中王重榮與宦者田令孜有隙。徙重榮兗州。以王處存爲河中節度使。詔克用以兵護處存之鎮。重榮使人給克用曰。天子詔重榮。俟克用至。與處存共誅之。因僞爲詔書示之。曰。此朱溫之謀也。克用信之。八上表請討溫。皆不許。克用愈怒。僖宗以重榮不徙兗州。遣邢州王玫。鳳翔李昌符討之。玫等亦陰符於溫。欲朝廷討克用。數遣人潛入京城。燒積聚。殺近侍。聲云克用所爲。會重榮告急於克用。克用遂以兵赴之。與玫等戰於沙苑。大敗之。遂進逼京城。令孜奉僖宗奔鳳翔。克用退屯河中。表請還宮。因罪狀令孜。請誅之。令孜復劫駕至興元。克用遂還太原。沙苑地名。在西安府朝邑縣南。

誓一生無改節。義士忠臣。

西川王建謀稱帝。遣克用書曰。請各帝一方。俟朱溫既平。乃訪唐宗室立之。退居藩服。克用復書云。誓於此生。靡敢失節。因語子存勗曰。昔天子幸石門。吾發兵誅賊臣。當是時。吾若挾天子據關中。自作九錫禪文。誰能禁我。顧吾家世忠孝。立功帝室。誓死不爲耳。石門鎮名。惟西安府淳化縣北有石門山。又平涼府靜寧州南有石門峽。未知孰是。

李存勗承王位。雪仇三矢。

克用卒。子存勗嗣位爲晉王。初。克用臨終。以三矢賜存勗曰。梁吾仇也。燕王吾所立。契丹背約歸梁。三者吾遺恨也。與汝三矢。無忘父志。存勗藏之。廟用兵。請矢。盛以錦囊。負而前驅。後

存勗果繫燕王劉守光父子。函梁朱友貞君臣之首。入太廟還矢焉。

滅仇梁繼唐統。氣概豪英。

唐天祐二十年。存勗自立爲帝。仍廟祀高祖太宗懿宗昭宗以下。上繼唐統。國號曰唐。是爲後唐莊宗。是年梁數道入寇。存勗召諸將會議。郭崇韜曰。梁今以精兵投段凝。凝非將材。不足畏。陛下若留兵守魏。固保楊劉。自以精兵長驅入汴。彼城中空虛。必望風潰矣。存勗遂以大军濟河。至鄆州遇梁兵。敗之。追至中都。圍之。梁兵潰。擒梁將王彥章。亟趨大梁。梁主友貞自殺。段凝降。梁遂滅。先是克用謂存勗。此子志氣遠大。必能成吾事。歐陽修五代史曰。方其繫燕父子以組。函梁君臣之首。入廟還矢。其意氣之盛。可謂壯哉。魏。今大名府。楊劉。城名。今東阿縣楊劉鎮是。鄆州。今兗州府鄆城縣。

張承業。一片心。忠言逆耳。

辜負了。老勅使。早自稱尊。

初。唐天祐十八年。存勗謀稱帝。魏州僧得傳國寶。獻之。將佐皆賀。監軍使張承業諫曰。吾王世世忠於唐室。所以老奴三十餘年。爲王捃拾財賦。召補兵馬。誓滅逆賊。復本朝宗社耳。今元兇未滅。而遽即大位。殊非王父子之初心。王何不先滅朱氏。求唐後而立之。使唐之子孫在。孰敢當之。使唐無子孫。天下之士。誰與王爭者。臣唐家一老奴耳。誠願見大王之成功。然後身遂田里。使百官送出洛東門。令路人指曰。此本朝敕使。先王時監軍也。豈不臣主俱榮哉。存勗曰。此非余所願。奈羣下意何。承業知不可止。乃仰天大哭曰。諸侯血戰。本爲唐家。今王自取之。誤老奴矣。卽歸太原。不食而卒。時年七十有七。承業。字繼元。憲僖宗時宦者。昭宗以爲監軍。

堪憾處。志驕盈。矜功十指。

荆南節度使高季興入朝。及歸。謂將佐曰。新朝百戰方得河南。乃對功臣舉手云。吾於十指上得天下。矜伐如此。誰不解體。吾無憂矣。吳嚴可求亦謂徐溫曰。聞唐主始得中原。志氣驕滿。不出數年。將有內變。但保境安民。以待之耳。荆南軍名。今荊州府。

侮縉紳。悅女色。寵任伶倫。

存勗自滅梁之後。漸恣荒淫。命伶人景進采擇民女三千餘人。以充後庭。尤寵任伶人出入宮掖。侮弄縉紳。羣臣憤激。莫敢出聲。四方藩鎮。爭以賄賂結之。其尤蠹政害人者。景進好采閭鄙細事以聞。存勗委以耳目。由是干預政事。施其讒慝。將相大臣皆憚之。

李天下。壞名聲。甘心下賤。

存勗幼善音律。或時自傳粉墨。與優人共戲於庭。以悅所寵劉夫人。優名謂之李天下。嘗自呼曰。李天下。李天下。優人敬新磨遽前批其頰。存勗失色。新磨徐曰。理天下者。只有一人。尙誰呼耶。存勗悅。厚賜之。

得蜀驕。輕屠膾。汗馬功勳。

唐遣魏王繼岌及侍中郭崇韜伐蜀。崇韜入散關。倍道而進。王承捷以鳳興文扶四州迎降。餘城鎮皆望風款附。進逼成都。蜀主衍降。梁震謂高季興曰。唐主得蜀益驕。亡無日矣。時崇韜在蜀。與宦者向延嗣有隙。延嗣歸譖之。存勗怒。復遣宦者馬彥珪詣成都。曰。崇韜若有遷延跋扈之狀。則與繼岌圖之。劉后復自爲教與繼岌。令殺崇韜。彥珪至蜀。繼岌遂如教殺之。并殺其諸

子時護國軍節度使朱友謙入朝。伶人景進譖之。亦見殺。并詔李紹奇滅其家。由是天下莫知崇韜等之罪。人情疑駭。李紹琛怒謂諸將曰。國家南取大梁。西定巴蜀。皆郭公之謀。而吾之功。至於與國家犄角以破梁。則朱公也。今朱郭皆無罪族滅。行及我矣。紹琛所將多河中兵。河中將焦武等號哭於軍門曰。西平王何罪。闔門屠膾。我輩歸則同誅。決不復東矣。遂俱反於蜀。顧氏曰。汧馬勳臣。闔門屠膾。而失功臣之心。鳳。今鳳縣。與今興安州。俱屬漢中府。文。今文縣。扶。故址在文縣西。屬鞏昌府。護國軍。今平陽府蒲州。西平王。郭崇韜追諡爲西平王。

登高歎石橋悲彷徨四顧

趙在禮作亂。遣歸德節度使李紹榮詣鄴都招諭。不從。乃命成德節度使李嗣源討之。軍士劫嗣源入鄴。欲與俱反。嗣源奔相州。紹榮奏嗣源叛與賊合。嗣源上章自理。皆爲紹榮所遏。嗣源疑懼。遂引兵據大梁。紹榮請存勗幸關東招撫。存勗遂發洛陽。至萬勝鎮。聞嗣源已據大梁。諸軍離叛。登高歎曰。吾不濟矣。卽命旋師。至石橋西。置酒悲泣。遂入洛陽。歸德軍。卽歸德府。相州。亦卽歸德。鄴郡。五代唐所置。今大名府。

郭門高下毒手樂器焚身

伶人郭從謙。以有功得寵。爲從馬直指揮使。郭崇韜方用事。從謙以叔父事之。及崇韜死。從謙數以私財享諸校。對之流涕。言崇韜之冤。從馬直軍士王溫等五人遂作亂。擒斬之。存勗戲謂從謙曰。汝旣負我附崇韜。又教王溫反。欲何爲也。從謙懼。退謂諸校曰。主上以王溫之故。俟鄴都平定。盡阮若曹。由是親軍皆不自安。從謙遂定計。帥所部兵攻興教門。存勗聞變。帥衛兵擊之。時亂兵已緣城而入。近臣宿將。皆釋甲潛遁。存勗爲流矢所中。鷹坊人善友扶至絳霄殿廡下。抽矢渴憊。須臾遂殂。善友歛樂器覆屍而焚之。郭從謙。優名郭門高。

唐明宗李嗣源胡人異姓